

waz ob minneclîchiu liebe ouch sie bestât?  
 sô möhtes ouch gelouben mir  
 daz ich si gar von herzen meine.  
 nû, Minne, bewære irz und bescheine;  
 5 daz ich iemer gerne diene dir.

Sumer unde winter beide sint  
 guotes mannes trôst, der trôstes gert:  
 er ist rehter fröide gar ein kint,  
 der ir niht von wîbe wirt gewert.  
 10 dâ von sol man wizzen daz,  
 daz man elliu wîp sol êren,  
 und iedoch die besten baz.

Sit daz nieman âne fröide touc,  
 sô wolte ouch ich vil gerne fröide hân  
 15 von der mir mîn herze nie gelouc,  
 ezn sagte mir ir güete ie sunder wân.  
 swenn ez diu ougen sante dar,  
 seht, sô brâhtens im diu mære,  
 daz ez fuor in sprûngen gar.

20 In weiz niht wol wiez dar umbe si:  
 sin gesach mîn ouge lange nie:  
 sint ir mînes herzen ougen bî,  
 sô daz ich ân ougen sihe sie?  
 da ist doch ein wunder an geschehen:

25 wer gap im daz sunder ougen,  
 daz ez si zaller zît mac sehen?

Welt ir wizzen waz diu ougen sîn,  
 dâ mit ich si sihe dur elliu lant?  
 ez sint die gedanke des herzen mîn:  
 30 dâ mite sihe ich dur mûre und ouch dur want.  
 nû hûeten swie si dunke guot:  
 sô sehent si doch mit vollen ougen  
 herze wille und al der muot.

Wirde ich iemer ein sô sælic man,  
 35 daz si mich ân ougen sehen sol?  
 siht si mich in ir gedanken an,  
 sô vergiltet si mir mîne wol.  
 mînen willen gelte mir,